

PÄÄIHI SIVNEDEM

Rukkoospuudâ stivree pappâ, eres servikoddepargee teikâ servikoddâlâš.

Vielgis lijnijn lovdum peevdi oolâ puáhtá pieijâđ meiddei riistâ teikâ krusifiiksi já cokkaittid kinttâl.

Päähii sivnedem puáhtá merkkid vihkâ- teikâ peerâráammättân.

1. Salmâ

Salmân puáhtá kevttid ovdâmerkkân saalmâ 72 teikâ 76. Saalmâ saajeest puáhtá leđe eres muusik.

2. Laidiittâs

Álgusivnádâs

Álgusivnádâs puáhtá lávlud teikâ luuhâđ.

P/O Eeji já + Alge já Pase Jiegâ noomân.

S Aamen.

P Mii išedeijee lii Hiärrá,

S sun, kote lii sivnedâm alme já eennâm.

TEIKÄ

P/O Hiärrá liävus tiigijn.

S Nuuvt še liävus sun tuu-uv jieggáin.

Laidiittâssäänih

Laidiittâssaaniid puáhtá rähtid meiddei rijjâht.

P/O Rähis ristâliih. Immeel lii sivnedâm puoh pyerrin, já mij uážžup väldid suu läähji kiihten vuástá. Sun lii adelâm tunnui [NN ja NN], taan päähii já puoh taarbâšlii ton várás. Onne mij kijttep Immeel, puoh lahjiij adeleijee, já kuullâp suu sääni. Áánnup suu sivnádâs taan pááikán já puohháid, kiäh tääbbin ääsih já kolliistâlleh.

TEIKÄ

P/O Rähis ristâliih. Päikki lii mijjân Immeel stuorrâ lähji. Pääihist mij halijdep eellid torvolávt já tuhhiittum olmožin. Mii Pestee puáhtá mieldioromijnis mii tarbâšem vuoiñâstâs já addâgâsadeleijee mielâ. Servideijeidis-uv sun ávžoo tuáivuttiđ ráávhus puoh paihijd. Onne mij kijttep taan pääihist já sivnedep tom. Pestem avžuuttâs mielđ ettâp: 'Ráávhu taan pááikán.' (Luuk. 10: 5)

3. Psalmâ

Puáhtá kevttiđ meiddei kirkkoive äigipuudâ miäldásijd teikâ eres psalmâid.

Psaalmâ saajeest puáhtá lávlud saalmâ.

Psaalmâ puáhtá lávlud teikâ luuhâđ. Ton aalgâst já loopâst puáhtá lede antifoni.

Psaalmân labdoo Uccâ kunnee. Ton saajeest puáhtá kevttiđ salmâveerstâ: 60: 8. Uccâ kunnee kuáđđoo meddâl västuääigi, 5. västuääigi pasepeeivi räajist.

Tot, kote áásá Alemuu syejeest

já ijâstâl Puohváldálii suoivust, iätá näävt:

”Tun, Hiärrá, lah lannaam já torvopáikkám,

Imelâm, tunjin mun turvâstâm.”

Hiärrá lebbee suájáidis tuu oolâ,

já tun lah torvoost tai vyelni.

Suu oskolâšvuotâ lii tunjin muvrâ já kolbâ.

Torvonâđ lii Hiärrá,

páikkád lii Alemuu syejeest.

Ps. 91: 1–2, 4, 9

TEIKÄ

Illood, eennâm! Pajediđ ávučuárvum Hiärán!

Palvâlid suu ilodin,

puáttid suu oovdân ávudin.

Tiettiđ, et Hiärrá lii Immeel.

Sun lii mii sivnedâm, já suu mij lep,
 suu aalmug, suu kuáttum saavzah.
 Puáttid suu äidiuvssáid kiihten,
 suu ovdâšiljoid alestâs láávlun.
 Kijtted suu, alestid suu noomâ.
 Pyeri lii Hiärrá!
 Avalávt pištá suu ármu,
 suu oskolâšvuotâ puolvâst puolvân.

Ps. 100

TEIKÄ

Jis Hiärrá ij táálu huksii,
 tušij tiet uáinih huksejeijeeh vääivi.
 Jis Hiärrá ij kaavpug vahtii,
 tušij tiet vahtâ kocá.
 Tušij tiet tij paijaanvetted tooláá,
 tušij tiet kocevettet manjedân
 já ruhnovetted liábád tiet.
 Siämmáánaál Hiärrá addel jieijâs oomijd,
 veik sij uádáččii.

Ps. 127:1–2

Uccâ kunnee

Kunnee Iáčán já Aalgan
 já Pase Jiegân,
 tego lâi aalgâst, tääl lii já ain,
 avalâšvuodâst avalâšvuotân. Aamen.

Antifoni kiärdoo

4. Ráámmátluuhâm

Lohhoo ohtâ teikâ mottoom čuávvuvâš ráámmátteevstâin.

Puáhtá kevttiđ meiddei ráámmátteevstâid kirkkoive äigipuudâ mielđ teikâ eres ráámmátteevstâid.

Lohhee almoot ráámmátpitá.

Fil. 4: 4–7

Ilodid ain Hiärást! Eedâm vala ohtii: ilodid! Puáđus tii lädisvuotâ puohâi ulmui tiätun. Hiärrá lii jo alda. Elled huolât masten, mut pyehtid ain tom, maid taarbâšvetted, ruhâdâlmáin, ánumáin já kijttemáin Immeel tiätun. Talle Immeel ráávhu, mii lii puoh ibárdâs paajaabeln, varjâl váimuidâd já jurduidâd, nuuvt et pisovetted Kristusist Jeesusist.

Kol. 3: 12–17

Tij, kiäh lepped Immeel väljejum ulmuuh, paseh já sunjin rákkáseh, kárvudâttâđ tääl váimulii ärmittetteevuotân, ustevlâšvuotân, vyeligâšvuotân, lädisvuotân já kierdâvâšvuotân. Anneed huolâ, et piergiivetted koskânâd, adelid kyeimi kuáimásâd addâgâs, veik tist ličij-uv aggâ läittimân. Tego Hiärrá lii adelâm tijjân addâgâs, nuuvt adelid tij-uv. Mut puoh ruvnân puáđus rähisvuotâ, tastko tot taha puoh tievâslâžžân. Haldâšus váimuinâd Kristus ráávhu, moos tij lepped oovtâ já siämmáá rummâš jesânin kuččum. Kolgâvetted meid lede kijttevááh. Adelid Kristus sääni aassâđ valjeeht koskâvuodâstâd. Máttááttid já ravvid kyeimi kuáimád puoh vijsesvuodáin já lávlud kijttevâš mieláin Imelân psalmâid, alestâssaalmâid já jiegâlâš lavluid. Maid porgâvetted-uv, sanijgijn teikâ tavoigijn, porgâđ puoh Hiärá Jeesus noomâst, kiihten suu peht Immeel, mii Eeji.

Hepr. 13: 2

Elled vájaldit čäittid kuásutteijeevuodâ, tastko motomeh láá ijjâsaje falâdijnis šoddâm faallâd ijjâsaje engâlaid.

Luuk. 19: 1–10

Jeesus poodij Jerikon já juudij kaavpug čoodâ. Tobbeen aasâi almai, kiän nommâ lâi Sakkeus. Sun lâi publikaanij njunošalmai já čuuvtij riges. Sun halijdij uáinid, mii almaid Jeesus lâi, mut ij uccevuodâs tiet olláám kuovlâd olmooš-juávhu tyehin. Nuuvtpâ sun kaačâi mottoom mádháá ovdâskulij já kuárñui mecciviigunmuorân, vâi uáináččij Jeesus, kote lâi puátimin ton luodâ miel. Mut ko Jeesus poodij ton sajan, sun keejâi pajas já eedâi: ”Sakkeus, puádi huápust vuálus. Onne must lii meeri lede kyessin tuu päähist.”

Sakkeus poodij huápust vuálus já vaaldij ilodin Jeesus kyessinis. Ko ulmuuh oinii taam, sij etti huánášin: ”Suddogâs almaa táálu sun vaaldij kyessiviäsunis.” Mut Sakkeus eedâi Hiärán puohâi kulâdijn: ”Hiärrá, näävt mun poorgâm: pele jieččân omâduvvâst adelâm kievhijd, já kiäst lam liijkás ennuv kiškom, toos máávsám neeljikiärdásávt maassâd.” Tom kulâdijnis Jeesus eedâi sunjin čuujootmáin: ”Onne lii piäluštâs šoddâm taan perruu uáassin. Liihân sun-uv Áábráhâm alge. Eidu tom, mii lii lappum, Ulmuu Alge lii puáttám uuccâd já piäluštid.”

Joh. 12: 1–3

Kuttâ peeivi ovdil pessijái Jeesus poodij Betanian, kost Lasarus, kiäm sun lâi cuvnâm jämimist, aasâi. Jeesusân fállójii tobbeen málláseh. Martta palvâlij kuosijd, já Lasarus lâi ohtâ Jeesus pevdiskipáriijn. Máárjá vaaldij tievâ puttâl

puigâ, hirmâd tiivrâs nardusoljo, vuoidâi Jeesus juolgijd já sihoi taid vuoptâidiskijn. Ubâ viste tievâi vuoidâs haajâst.

Joh. 15: 9–12

Jeesus iätá:

”Tego Eeči lii rähistâm muu, nuuvt lam mun rähistâm tii. Cuápcud muu rähisvuodâst. Jis nuávditvetted muu pákkumijd, tij cuápcuветted muu rähisvuodâst, tego mun lam nuávdittâm Iäččán pákkumijd já cuápcum suu rähisvuodâst.

Lam sárnum tijjân taam, et tist ličij muu ilo váimuinâd já illood šodâččij tievâslâžžân. Muu pákkum lii taat: rähistid kyeimi kuáimád, tego mun lam rähistâm tii.”

5. Vástádâs

Vástádâssân puáhtá leđe salmâ, psalmâ, laavlâ, čuojânâsmuusik.

Maangâid teevstâid luvâdijn ráammátluuhâm já vástádâs pyehtiv leđe vuáruttuvâi.

6. Saahâ

7. Salmâ

Saalmâ saajeest puáhtá leđe eres muusik.

8. Ruhâdâspuddâ

Vuárurukkoos

P/O Alestum lah tun, Hiärrá, mii Immeel!

S Tuu lii puoh, mii lii almeest já eennâm alne.

P/O Sivnedum liävus Hiärá nommâ tääl já ain.

S Škájus Hiärá noomâ alestâs!

Sivnedem

Rukkoos puáhtá ráhtid meiddei ríjjáht.

[**P/O** Immeel lii pyerivuodâstis adelâm mijjân pääihi já aldaas ulmuid. Sivnedus kulmâohtâsâš Immeel, Eeči já + Alge já Pase Jieggâ, taam pääihi já puohâid, kiäh tääbbin ääsih já kolliistâlleh.]

Rukkoos

P/O Ruhâdâllup.

1. Almalâš Eeči. Mij alestep tuu lahjijnâd já mieldiorroomstâd eellim puoh puudâin. Kiedâstâd uázžup väldid puoh, mii mist lii. Iššeed mii kevttid tuu adelem laahjijd rievtnisnâál. Sivned taam pääihi. Adde taid, kiäh ääsih tääbbin, tubdâd torvo já oohtânkuullâm. Iššeed sii rähistid já kunnijâttid kyeimi kyeimis. Adde meid taan päähist kolliistâllei tubdâd liegâsvuodâ já ustevvuodâ. Kuulâ mii Algaad Jeesus Kristus, mii Hiärá tiet.
2. Pyeri Immeel. Mij kijttep tuu pääihist, mon lep finnim. Kijttep tast, et mist lii saje, kost uázžup eellid, porgâd, vuoinâstid já orrood joskâ. Liččih tun mii päikkin, Hiärrá. Suoijâl mii pyerivuodâinâd, nuuvt et puávtáččijm tubdâd torvo já ráávhu já uázžud vuoimijd jieččân pargoid. Räähti, Hiärrá, páikkâsân vuádu, mii ciävzá killáamušâin. Räähti mist soovâd vuodâ occeid. Iššeed mii kavnâd uudhijd, moh tuálvuh osko äärbi suhâpuolvâst suhâpuolvân. Adde páikkán lede áávus puohhâid, kiäid vuolgâttah mii kuuvl. Taam áánnup Algaad Jeesus Kristus noomâst.

S Aamen.

Mii Eeči

Hiärá rukkoos ciälkkoo oovtâ jienân.

S Mii Eeči, kote lah oolmijn.

Pasottum liävus tuu nommâ.

Puáđus tuu vâldikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâs,

nuuvtko mij–uv addâgâs adelep toid,

kiäh láá mii vuástá rikkom.

Já ele joodeet mii kivsádâsân,

mut peesti mii paast.

Tastko tust lii vâldikodde já vyeimi já kunnee nuvâhännáá.

Aamen.

9. Salmâ

Puáhtá kevttiđ ovdâmerkkân saalmâ 59 teikâ 75: 1 - 3.

10. Sivnádâs

P/O Sivnedus mii puohvâldâlâš já ármugâs Immeel, Eeči já +
Alge já Pase Jieggâ.

S Aamen.

TEIKÂ

P/O Hiärrá sivnedus tii já varjâlus tii.

Hiärrá čuovvâdus muáđuidis tijjân

já liävus tijjân ármulâš.

Hiärrá jurgâlus muáduidis tii piälán
já adelus tijjân ráávhu.
Eeji já + Alge já Pase Jiegâ noomân.

S Aamen.

11. Loppâmuusik

Loppâmuusik puáhtá lede salmâ, laavlâ já/teikâ čuojânâsmuusik.
Puáhtá kevttiđ ovdâmerkkân saalmâ 88: 2 – 4.